



“Jitahidi kujionyesha kuwa umekubaliwa na Mungu, mtenda kazi asiye na sababu ya kutahayari, ukitumia kwa halali neno la kweli.” 2 Timotheo 2:15

Kufanya wafuasi 1 - Kudumu katika Neno Lake

SOMO LA 8 - MAPENZI YA MUNGU

“Basi, ndugu zangu, nawasihi, kwa huruma zake Mungu, itoeni miili yenu iwe dhabihu iliyo hai, takatifu, ya kumpendeza Mungu, ndiyo ibada yenu yenye maana. Wala msiifuatishie namna ya dunia hii; bali mgeuzwe kwa kufanywa upya nia zenu, mpate kujua hakika mapenzi ya Mungu yaliyo mema, ya kumpendeza, na ukamilifu.” Warumi 12:1-2

Kuyajua mapenzi ya Mungu ni muhimu sana kwa kila muumini. Hata hivyo, lengo letu lisiwe tu kuyajua mapenzi ya Mungu. Lengo letu pia lastahili kuwa kutenda mapenzi ya Mungu. Sehemu kubwa ya mwongozo wake katika maisha yetu ni wa kijumla kwa Waumini wote. Pia ana mapenzi mahususi kwa kila muumini. Hakuna njia ya mkato, sarakasi wala mazingaombwe kupambanua mapenzi ya Mungu. Mara nyingi Mungu hatimaye hufunua mapenzi yake kwetu tunapoendelea kukua na kutembea naye. Ni matokeo ya utaratibu wa kutembea naye katika uaminifu.

Umuhimu wa kuyafuata mapenzi ya Mungu unajidhihirisha katika maisha ya Yesu. Alisema bayana, *“Yesu akawaambia, Chakula changu ndicho hiki, niyatende mapenzi yake aliyenipeleka, nikaimalize kazi yake,”* Yohana 4:34. Yesu pia alisema, *“Kwa kuwa mimi sikushuka kutoka mbinguni ili niyafanye mapenzi yangu, bali mapenzi yake aliyenipeleka,”* Yohana 6:38. Ni dhahiri kwamba kabla ya kutenda mapenzi ya Mungu lazima tuelewe mapenzi yake ni nini, *“Kwa sababu hiyo msiwe wajinga, bali mfahamu ni nini mapenzi ya Bwana,”* Waefeso 5:17.

Tunaweza kuyajua mapenzi ya Mungu kwa ajili ya maisha yetu. *“Nitakufundisha na kukuonyesha njia utakayoiendea; Nitakushauri, jicho langu likikutazama,”* Zaburi 32:8. *“Mtumaini BWANA kwa moyo wako wote, Wala usizitegemee akili zako mwenyewe; Katika njia zako zote mkiri yeye, Naye atayanyosha mapito yako,”* Mithali 3:5-6. Biblia inatuhakikishia kuwa mapenzi yake kwetu ni mema. *“Nasi twajua ya kuwa katika mambo yote Mungu hufanya kazi pamoja na wale wampendao katika kuwapatia mema, yaani, wale walioitwa kwa kusudi lake,”* Warumi 8:28. *“Hatua za mtu zaimarishwa na BWANA, Naye aipenda njia yake. Ajapojikwaa hataanguka chini, BWANA humshika mkono na kumtegemeza,”* Zaburi 37:23-24. Kanunni hiyo inajitokeza kwa uwazi katika, *“Maana nayajua mawazo ninayowawazia ninyi, asema BWANA, ni mawazo ya amani wala si ya mabaya, kuwapa ninyi tumaini siku zenu za mwisho,”* Yeremia 29:11.

Tunajua mapenzi ya jumla ya Mungu au kwa waumini wote moja kwa moja kutoka katika Biblia. Mapenzi yake ya jumla ni sawa kwa kila muumini. Tunajua mapenzi binafsi ya Mungu kwa kila muumini yanatokana na maisha ya uaminifu kwa jumla katika Mungu. Kutoka kwa msingi huo wa utii, tunafuata hatua tatu za kubainisha na kuchukua hatua kwa mapenzi ya Mungu kwa mtu binafsi ... Tunamuuliza Baba ... tunapata mwongozo kutoka katika Neno Lake. Hekima Yake, watu wake na amani yake ... na tunatenda tunapojua mapenzi yake.

MAPENZI YAKE YA JUMLA. Sehemu kubwa ya mapenzi ya Mungu katika maisha yetu ni sawa kwa waumini wote bila ubaguzi. Tunaelewa mapenzi ya jumla ya Mungu moja kwa moja kutoka kwenye Bibilia. Tunajifunza kuhusu mapenzi yake ya jumla kwetu sisi kupitia amri zake Mungu, kanuni na mifano ipatikanayo katika neno lake.

Amri. Kuna amri za jumla na zisizojadilika katika Bibilia ambazo zimetolewa kwa kila muumini. *“Maana haya ndiyo mapenzi ya Mungu ... mwepukane na uasherati,”* 1 Wathesalonike 4:3. *“Furahini siku zote; ombeni bila kukoma; shukuruni kwa kila jambo; maana hayo ni mapenzi ya Mungu kwenu katika Kristo Yesu. Msimzimishe Roho,”* 1 Wathesalonike 5:16-18. *“Tiini kila kiamriwacho na watu, kwa ajili ya Bwana ... Kwa sababu ndiyo mapenzi ya Mungu,”* 1 Petro 2:13-15. Yesu anatarajia tutii amri hizi na nyinginezo, *“Mkinipenda, mtazishika amri zangu,”* Yohana 14:15. Utiifu unastahili kuwa zaidi ya uamuzi wa saa baada ya saa. Utiifu unastahili kuwa mtindo wa maisha.

Kanuni. Kuna kanuni katika Bibilia zinazoshughulikia hali tofauti. Kuna kanuni ya usimamizi mwema mwanzoni mwa sura ya 16 ya kitabu cha Luka. Gharama ya uanafunzi ipo mwishoni mwa sura ya 14 ya kitabu cha Luka. Kanuni ya kutenga muda wa kuwa na watu waliopotea imewakilishwa kwenye hadithi tatu zenye mafumbo katika sura ya 15 ya Luka. Tunahitaji kuzielewa na kuzitumia kanuni hizi nyingi zilizo kwenye agano la kale na agano jipya la Bibilia. Kanuni hizo na amri zinatupa taswira ya mapenzi ya jumla ya Mungu kwa maisha yetu.

Mifano. Bibilia ina mifano mizuri ya kufuatwa ... na mibaya ya kuepuka. Mfano mzuri ni maisha ya Kristo. Akiosha miguu ya wafuasi wake, Yesu alisema, *“Kwa kuwa nimewapa kielelezo; ili kama mimi nilivyowatendea, nanyi mtende vivyo,”* Yohana 13:15. Tunapaswa kufuata mfano wake wa unyenyekevu, Wafilipi 2:5. Tunapaswa kutembea kwenye nyayo zake, 1 Petro 2:21, 1 Yohana 2:6. Na kuna aina nyingi zaidi ya mifano tunayostahili kuifuata kama vile hadithi nzuri ya Danieli ya kumheshimu na kumhudumia Bwana mahala ambapo hakuna Mungu. Mtume Paulo alitoa mfano mzuri kwenye kitabu cha Matendo ya Mitume sura ya 17. Paulo aliandika hivi, *“Mnifuata mimi kama mimi ninavyomfuata Kristo,”* 1 Wakorintho 11:1. Aidha, kuna mifano mibaya ya kuepukwa kama ule wa Mfalme Sauli ambaye hakumheshimu Mungu kikamilifu ... Uzinzi wa Daudi na Bathsheba ... na kushindwa mara 17 katika nyakati za Waamuzi.

MAPENZI YAKE MAHUSUSI. Mungu ana mapenzi mahususi kwa kila muumini kama tunavyoona katika Zaburi 32:8, Mithali 3:5-6, Warumi 8:28, Zaburi 37:23-24, na Yeremia 29:11. Kuna mifano mingi katika Bibilia. Daudi aliandika, *“Maana Wewe ndiwe uliyeniumba mtima wangu, Uliniunga tumboni mwa mama yangu ... Macho yako yaliniona kabla sijakamilika; Chuoni mwako ziliandikwa zote pia, Siku zilizoamriwa kabla hazijawa bado,”* Zaburi 139:13, 16. Mungu alikuwa na mapenzi maalumu kwa nabii Yeremia, *“Kabla sijakuumba katika tumbo nalikujua, na kabla hujatoka tumboni, nalikutakasa; nimekuweka kuwa nabii wa mataifa, ... maana utakwenda kwa kila mtu nitakayekutuma kwake, nawe utasema kila neno nitakalokuamuru,”* Yeremia 1:5, 7. Mapenzi mahususi ya Mungu kwa Ayubu yalitokana na mazungumzo mara mbili huko mbinguni, Ayubu 1 na 2. Nuhu alitwa ili kujenga Safina, Mwanzo 6. Ibrahimu aliamriwa na familia kwenda katika nchi ya kigeni, Mwanzo 12, na akaambiwa amtoe mwanawe Isaka kama dhabihu, Mwanzo 22. Rebeka aliteuliwa kuwa mke wa Isaka, Mwanzo 24:14, 44. Yona aliagizwa kwenda Ninawi, Yona 1. Yesu aliwachagua wafuasi wake, wao hawakumchagua, Yohana 15:16. Paulo alitwa ili kuwa Mtume, 1 Wakorintho 1:1. Na Roho Mtakatifu huwapa waumini karama mbalimbali jinsi kama anavyoongozwa na Yesu [Angalia sura ya 9 ya somo hili].

KUTAMBUA MAPENZI YAKE MAHUSUSI

Hatua Tatu. Fuata hatua hizi tatu ili kujifunza na kufanya mapenzi yake mahususi. Kwanza **muulize** Mungu akuambie. Pili, **pata ushauri** kutoka kwa Neno Lake, Hekima Yake, Watu Wake na Amani yake. Na tatu, chukua **hatua** ... tenda lile Mungu anakwambia utende.

Uliza. Mahala pa kuanzia kujua Mapenzi Yake mahususi kwako ni maombi. Ombi la mwandishi wa Zaburi linapaswa kuwa letu, *“Unifundishe kuyatenda mapenzi yako,”* Zaburi 143:10. Katika sala ya Bwana, Yesu aliwafundisha wafuasi wake kuomba, *“Mapenzi yako yatimizwe,”* Mathayo 6:10. Mtume Paulo aliomba kuwa waumini wa Kolosai, *“mjazwe maarifa ya mapenzi yake,”* Wakolosai 1:9. Epafras alifanya bidii siku zote kwa ajili yenu katika maombi yake, *“ili kwamba msimame wakamilifu na kuthibitika sana katika mapenzi yote ya Mungu,”* Wakolosai 4:12. Maombi ya dhati kwa ajili yetu, na wengine, yanapaswa kuwa kujua na kuyatenda mapenzi ya Mungu.

Pata mwongozo. Mungu hutupatia mapenzi yake mahususi kupitia kwa Neno Lake, hekima yake, watu wake, na amani yake. Tunamwomba Bwana aweze kutufunulia mapenzi yake kwetu ... na anayajibu maombi hayo kupitia kwa njia nne nilizoelezea hapa chini.

Neno Lake. Kuyajua mapenzi mahususi ya Mungu kwako mara nyingi ni matokeo ya utaratibu wa usomaji wa Biblia. Au kunaweza kutokana na usomaji wa neno kuambatana na hali fulani. Mapenzi mahususi ya Mungu kwetu yanabainika tunapoendelea kupata hekima na uelewa wa neno la Mungu. Kamwe hatatuongoza kutenda jambo kinyume cha Neno Lake.

Hekima Yake. Hekima ya Mungu hutokana na maisha ya utiifu kwa roho mtakatifu, 1 Wakorintho 2:14-3:3. Tunapotembea na Mungu kwa utiifu, ndipo tunapolielewa Neno Lake na mapenzi yake. Paulo aliandika, *“Wala msifuatishie namna ya dunia hii; bali mgeuzwe kwa kufanywa upya nia zenu, mpate kujua hakika mapenzi ya Mungu yaliyo mema, ya kumpendeza, na ukamilifu,”* Warumi 12:2. Hekima ni tofauti na maarifa. Muombe Mungu kwa ajili ya Hekima Yake, *“Lakini mtu wa kwenu akipungukiwa na hekima, na aombe dua kwa Mungu ... naye atapewa,”* Yakobo 1:5.

Watu Wake. Watu wa Mungu ni nyenzo kwa ajili ya kuelewa mapenzi ya Mungu. Wale wafundishao Neno Lake kupitia unenaji au maandishi wanaweza kusaidia, Wakolosai 1:28. Ni vyema kupata ushauri nasaha kutoka kwa waumini waliopevuka. Ni bora zaidi kuwa na zaidi ya mshauri mmoja, *“Pasipo mashauri makusudi hubatilika; Bali kwa wingi wa washauri huthibithika,”* Mithali 15:22. Lakini kumbuka ushauri ni ushauri tu. Wingi wa kura kwa washauri wengi huenda ukawa sawa ... au waweza kuwa usio sawa. Kumi kati ya wapelelezi waliotumwa Kanani katika kitabu cha Hesabu sura za 13 na 14 hawakuwa sawa. Waumini waliopevuka wanaweza kutupatia ushauri wa kutuwezesha kuelewa mapenzi ya Mungu.

Amani Yake. Amani ya Mungu, ikiwa inatoka kwake, yaweza kuwa uthibitisho kamili wa mapenzi mahususi ya Mungu, *“Na amani ya Kristo iamue mioyoni mwenu,”* Wakolosai 3:15. *“Na amani ya Mungu, ipitayo akili zote, itawahifadhi mioyo yenu na nia zenu katika Kristo Yesu,”* Wafilipi 4:7. Amani hii inatokana na Mungu na kuna usahihi kuhusu uamuzi huo. Hautokani na mihemko au hamu ya binadamu. Amani yake ni uthibitisho unaotokana na maombi, usomaji wa Biblia, hekima ya kiroho na inaakisi busara kutoka kwa washauri kadhaa waliopevuka katika mambo ya kiroho. Tafuta na uitumainie Amani Yake.

Tenda. Tunapojua mapenzi ya Mungu kwetu, ndio wakati wa kutenda. Huenda jibu likawa *hapana* kama ilivyokuwa kwa Paulo kwenye 2 Wakorintho 12:7-10. Inaweza kuwa, *subiri* ... ikimaanisha tuendelee kutafuta mapenzi yake. Jibu la *subiri* laweza kuwa baraka kubwa, Isaya 40:31. Ikiwa jibu leke ni *ndiyo* inatupasa kutenda mapenzi yake hata kama ni kuhusu jambo gumu, lisilo la raha, lisilopendeza au la gharama kubwa. Inatubidi tufurahie kutenda mapenzi yake ... na tufanye kutoka mioyoni mwetu, Zaburi 40:8 na Waefeso 6:5-6.

MAONYO

Neno Lake. Mungu *hatatupatia* ushauri wake mahususi unaokwenda kinyume cha Neno lake. *Hataongoza* kinyume cha Neno lake ... haijalishi kiwango cha ushauri tunadhani tunacho ... haijalishi ushauri tutakaopata ... au aina gani ya mazingira tulimo, wala amani tunayoihisi. Liamini neno la Mungu katika hali hizi zote.

Miadi. Gideoni alifanya miadi na Mungu ili apate kujua mapenzi yake kuhusu hali ya vita iliyomkabili. Hiki chaweza kuwa kitendo hatari kufanya. Gedioni alihofia hasira ya Mungu ingewaka juu yake kwa kutomwamini kikamilifu. Hali ya kumtaka Mungu kuthibitisha ikiwa yuko upande wako si jambo rahisi kudiriki kufanya siku hizi, jinsi ilivyokuwa zamani. Siku hizi tunaweza kuweka miadi kama hiyo na Mungu, lakini baada ya maombi na kujihoji kwingi.

Mateso. Mateso si lazima yatokane na mapenzi ya Mungu. Mara nyingi ni mapenzi ya Mungu kuwa muumini apitie mateso. 1 Petro 3:17, 1 Petro 4:19, 2 Wakorintho 4:7-18. Mateso huenda yakakusaidia kutenda mapenzi ya Mungu. Mateso yanaweza kukusaidia kutenda mapenzi ya Mungu, 1 Petro 4:1-2. Mfano mzuri ni mateso wakati wa kanisa la awali, Matendo ya Mitume 8:1-4, ambayo yaliwalazimu waumini kupeleka injili nje ya Yerusalemu kama sehemu ya kuafiki taarifa ya Yesu kwenye kitabu cha Matendo ya Mitume 1:8. Dhahabu hupitishwa kwenye tanuri ili kuifua, Isaya 48:10. Maisha rahisi na yenye ufanisi yanayoahidiwa na wale wanaohubiri injili ya afya nzuri na utajiri, hayamo kwenye ushauri wa bibilia.

Uwakili Endelevu. Mapenzi ya Mungu kwetu yanajumuisha ukuaji imara, jinsi tunavyojifunza kutembea naye. Musa alichukua muda wa maka 40 akitayarishwa kwa ajili ya majukumu yaliyokuwa mbele yake, akianza na kuchunga kondoo wasumbufu, kabla ya kipindi cha miaka 40 na wana wa Israeli jangwani. Baada ya kukutana na Mungu, ilimchukua mtume Paulo miaka 14 kujiandaa kwa ajili ya safari yake ya kwanza ya kimishenari. Yesu alifundisha kanuni hii katika Luka 16:10-13.

Mikingamo. Kutambua mapenzi ya Mungu kunahitaji uwiano. Ni hatari kuangazia tu upande mmoja wa kujua mapenzi ya Mungu [bila kuweka uwiano] huku tukipuuza sehemu nyingine za kujua mapenzi ya Mungu. Kuelekeza fikra zetu zote kwa kutumia hekima, bila kuzingatia amani ya Mungu ni jambo hatari ... Huenda tukajaribiwa hata kutoshirikisha mwongozo wa Roho Mtakatifu kwenye lolote tufanyalo.

Majibu ghushi. Jihadhari na majibu ghushi yanayofundishwa katika jina la Ukristo. Hakuna njia za mkato, vimbwanga wala majibu ya kimiujiza kuhusu kumjua Mungu. Hakuna ujuzi wa mara moja unaotupatia majibu ya kujua mapenzi ya Mungu. Hakuna ujuzi mmoja tu unaotosha kutupatia hekima.

Acts One Eight [Matendo Moja Nane] huchapisha tafsiri hii ya Kiswahili ya kozi ya lugha ya Kiingereza ya *Disciplemaking 1 ... Abiding in His Word*. Unaweza kunakili kozi hii au sehemu yake yoyote bila malipo au kwa gharama ya usambazaji pekee, bila kubadilisha maudhui yake na ukiwa umeambatanisha kauli hii ya chanzo. Kozi hii inapatikana bila malipo katika lugha ya Kiswahili kutoka katika www.Theolojia.org au katika lugha ya Kiingereza kutoka katika www.VirtualBibleAcademy.org. Kwenye tovuti hizi, unaweza kusoma mtandaoni, kufundishwa, kupakua, au kuchapisha nakala zako mwenyewe. Nukuu za Biblia ya Kiswahili zimetoka katika Biblia ya Swahili Union Version (SUV) ya 1997.

Kufanya wafuasi 1 - Maswali ya Marudio

Somo la 8 - Mapenzi ya Mungu ... ukurasa wa 110 - 113

Sehemu ya kujifunza ni kupitia kwa njia ya kutathmini ... kuhifadhi maarifa mapya kwenye hifadhi ya muda mrefu. Chapisha nakala hii ya uchunguzi au utumie karatasi ya ziada kujibu maswali yafuatayo. Kisha rudia jaribio hili kwa kurejelea kitabu au bila kurejelea kitabu, fungua hadi utakapofanikiwa kujibu maswali yote. *Mitihani hii ya kujitathmini* inapatikana ikiwa na majibu sahihi kwenye VirtualBibleAcademy.org.

ANDIKA “KWELI” AU “SI KWELI” KANDO YA KAULI YA 1 - 9

1. *Mapenzi ya jumla* ya Mungu yanawahusu waumini wengi.
2. *Mapenzi mahususi* ya Mungu yanaweza kuwa tofauti kwa waumini tofauti.
3. Si mara moja Mungu hudhihirisha mapenzi yake kwetu kama matokeo ya utiifu wetu.
4. Waumini wanaweza kujua *mapenzi ya jumla* na *mapenzi mahususi* ya Mungu kwa ajili yao.
5. Mara nyingi mapenzi ya Mungu kwa Waumini ni mazuri.
6. Kanuni kutoka kwenye Biblia zinahusu hali nyingi tofauti.
7. Mifano yote ya Kibiblia sharti ifuatwe.
8. Mungu hatatuongoza kutotii Neno Lake.
9. Hatua ya kwanza ya kupata *mapenzi mahususi* ya Mungu ni kutafuta amani yake.
10. Orodhesha amri tatu zilizo na maneno “*mapenzi ya Mungu.*”
 - a.
 - b.
 - c.
11. Hatua tatu za kujifunza *mapenzi mahususi* ya Mungu kwetu ni:
 - a.
 - b.
 - c.

12. Katika kutafuta *mapenzi mahususi* ya Mungu, Waumini hupata mwongozo kutoka katika _____, ya Mungu, kutoka kati ka _____, yake, kutoka kwa _____, kutoka katika _____ yake.
13. *Kweli* au *Si Kweli*: Kwa kutafuta mapenzi ya Mungu kuhusu mtu binafsi, wengi watakaopiga kura ya kutafuta mapenzi yake, wingi wa kura miongoni mwa waumini ni kweli. _____
14. *Kweli* au *Si Kweli*: Amani ya Mungu ni uthibitisho wa mwisho kwa Muumini anayetafuta mapenzi mahususi ya Mungu. _____
15. *Kweli* au *Si Kweli*: Amani ya Mungu ni uthibitisho wa mwisho kwa muumini anayetafuta *mapenzi mahususi* ya Mungu kwake. _____
16. Kwa kutafuta *mapenzi mahususi* ya Mungu, majibu haya matatu yanawezekana:
- a.
 - b.
 - c.
17. Tunapojua *mapenzi yake mahususi*, sharti tuchukue _____.
18. Andika Isaya 40:31 hapa chini ... kama ilivyoandikwa kwenye Bibilia yako.

Kufanya wafuasi 1 - Majibu ya Maswali ya Marudio

Somo la 8 - Mapenzi ya Mungu ... maswali ukurasa wa 114 -115

Usitumie karatasi hizi za majibu kutafuta majibu yako. Tafadhali zitumie tu kuangalia ikiwa umepata majibu sahihi. Rejelea somo lako hadi utakapopata habari za kukusaidia kusahihisha majibu kwa maswali yako. Masomo yote, majaribio ya kutathmini na karatasi za majibu zinapatikana kwenye VirtualBibleAcademy.org.

ANDIKA “KWELI” AU “SI KWELI” KATIKA KAULI ZA 1 - 9

1. *Mapenzi ya jumla* ya Mungu yanawahusu waumini wengi. *SI KWELI*
2. *Mapenzi mahususi* ya Mungu yanaweza kuwa tofauti kwa waumini tofauti. *KWELI*
3. Si mara moja Mungu hudhahirisha mapenzi yake kwetu kama matokeo ya utiifu wetu. *KWELI*
4. Waumini wanaweza kujua *mapenzi ya jumla* na *mapenzi mahususi* ya Mungu kwa ajili yao. *KWELI*
5. Mara nyingi mapenzi ya Mungu kwa Waumini ni mazuri. *SI KWELI*
6. Kanuni kutoka kwenye Bibilia zinahusu hali nyingi tofauti. *KWELI*
7. Mifano yote ya Kibiblia sharti ifuatwe. *SI KWELI*
8. Mungu hatatuongoza kutotii Neno Lake. *KWELI*
9. Hatua ya kwanza ya kupata *mapenzi mahususi* ya Mungu ni kutafuta amani yake. *SI KWELI*
10. Orodhesha amri tatu zilizo na maneno “*mapenzi ya Mungu.*”
 - a. *Jiepushe na mtego wa uzinzi.*
 - b. *Furahini kila wakati, ombeni bila kukoma, katika kila jambo mshukuruni Mungu.*
 - c. *Tii kila mamlaka ya binadamu.*
11. Hatua tatu za kujifunza kujua *mapenzi mahususi* ya Mungu kwetu ni:
 - a. *Uliza (omba).*
 - b. *Pata mwongozo.*
 - c. *Tenda.*

12. Katika kutafuta *mapenzi mahususi* ya Mungu, Waumini hupata mwongozo kutoka katika _____ *Neno* _____, ya Mungu, kutoka katika _____ *Hekima* _____, yake, kutoka kwa _____ *Watu* _____, kutoka katika _____ *Amani* _____ yake.
13. *Kweli* au *Si Kweli*: Kwa kutafuta mapenzi ya Mungu kuhusu mtu binafsi, wengi watakaopiga kura ya kutafuta mapenzi yake, wingi wa kura miongoni mwa waumini ni kweli. _____ *Si Kweli* _____
14. *Kweli* au *Si Kweli*: Amani ya Mungu ni uthibitisho wa mwisho kwa Muumini anayetafuta mapenzi mahususi ya Mungu. _____ *Si Kweli* _____
15. *Kweli* au *Si Kweli*: Amani ya Mungu ni uthibitisho wa mwisho kwa muumini anayetafuta *mapenzi mahususi* ya Mungu kwake. _____ *Kweli* _____
16. Kwa kutafuta *mapenzi mahususi* ya Mungu, majibu haya matatu yanawezekana:
- a. *Ndiyo*
 - b. *Hapana*
 - c. *Subiri*
17. Tukijua *mapenzi yake mahususi*, sharti tuchukue _____ *hatua (ikiwa na maana kutii)* _____
18. Andika Isaya 40:31 hapo chini ... kama ilivyoandikwa katika Biblia.
(*Inapaswa kunakiliwa neno kwa neno kama ilivyoandikwa katika Biblia yako*)